

## A SCUELE DI AUTONOMIE

In tun secul di agjtazions e di sbalgjos e jè stade fate in Italie une unificazion pulitiche e aministrative, no une *unitât* di spirt, di aspirazions e nancje di intares: su chest cont o sin, pôc sù pôc jù, come dal 1848. E cheste unificazion e jè stade cunbinade par opare di une minorance di cuatri scjaldinôs pôc o trop intaressâz, fûr de volontât o cuintri la volontât de masse popolâr; al ven a jessi cence che la vere volontât dal popul e vebi podût manifestâsi cun libertât e cun maduritât, savint ce che faseve.

Unificazion inponude, duncje: inponude a spesis de libertât e in non de libertât! E cussì nè madurazion pulitiche nè cussiense nè educazion, di popul civîl no si è mai rivâz adore di vê in Italie; i svelz e àn futût i biâz e avonde. E jè fraide la lidrîs: "putet in capite!". E chesc' ultins vinc' ains lu àn mostrât ancje ai vuarps. Cumò il popul nol è tant indaûr che si puedi fâj ganbiâ strade midiant di une barbarie rivoluzionarie, nè tant indevant che si lu puedi morestâ metinlu un pôc tal fen come lis gnespulis.

Par ch'al inpari a jessi libar e a governâsi cun tun fregul di sintiment e di misure, par puartâlu a nivei dai "popui libars", bisugnares fâ come cui fruz di scuele: dividilu in tanc' tropuz e, trop par trop, insegnâj a vivi cun serietât e dignitât. L'autonomie e otignares ancje chest risultât educatîf: ognidun al sares interessât da vizî e diretamentri tes facendis publichis, al inparares a capî e a doprâ la sô inteligjense te direzion dal Cumun e de Regjon, dentri un cunfin avonde stret par no fâ sbalgjos masse grues, e avonde larc par fâ un fregul di sperienze di là dal so intares personâl.

Dopo fat chest garzonât, si podares viodi s'al vares ancjemò gole di une unitât plui largje e in ce forme.

(Patrie dal Friûl - 9/6/1946)